

nisi primo quoque tempore ex Italia ac reliqua Europa nova mittantur auxilia, non multo post, sublato ex Asia non tantum regno, sed Christiano etiam nomine, omnia in Turcorum potestatem essent concessura. Calistus magnitudine periculi motus, continuo Italiae vires circumspicere cepit: constititque Venetos solos esse, qui in Syria Christianorum opes eo temporum statu retinere possent. Per legatos itaque Dominicum Ducem precatus est, ut confestim potentissima classe instructa, ad Christianam rem tuendam in Asiam transmitteret. Tum populo ad concionem vocato, divinis rebus rite procuratis, iussu Principis ita Antistitem urbis ad populum locutum ferunt: *Quae in Asia superioribus annis pro Palestinae terrae recuperatione, quam vos Tellurem sanctam vocatis, partim nostris, partim caeterarum Europae gentium auspiciis gesta sint, puto vos, viri Veneti, non ignorare. Nam sextus, ni fallor, ab illo & vicesimus nunc annus agitur, quo ingens illa Christianorum manus in Asiam transmisit: ubi Dei benignitate, suaque virtute, quicquid terrarum est a Bitinia in Syriam, brevi id totum ex immanissimo hoste armis recepere. Nec interim & in Ionia, Smyrna capta, & circa maritimae Syriae oram, pauca a nostris gesta dicuntur, ubi non tantum gloriam ingentem consecuti sumus, sed in partem etiam receptarum urbium admissi. Quod si recte omnia animo consideratis, certissima quaedam fundamenta Veneti imperii in Syriam promovendi praecleara illa expeditione jacta videri possunt. Verum intra paucos annos accidit, ut Gothifredi, Baldoini, Boemundi, & aliorum illustrium ducum morte, qui fatali necessitate ex humanis concessere, ita res nostrae in Syria mutatae sint, ut non modo non sint in eo felici, in quo fuerant, cursu: sed retro, ut ajunt, labentes, atque in dies tenuiores factae, magisque ac magis hostium injuriae obnoxiae, modicam spem ipsius provinciae retinendae nobis reliquerint. Id metuens Baldoinus secundus, ad nos non multo ante legatos misit, qui supplices magnaue praemia pollicentes rogarent, ut confestim classem expediremus numerosissimam, atque ubi primum fieri posset, in Asiam transmitteremus.*

*Antistitis
Veneti jussu
Principis
ad populum
Venetum
habita oratio
hortatoria
ad instruendam
classem in
Syriam.*

*Dominicus
Michael
Dux Venetorum.*

1123